

Տարեմուտ

Բացվել են «Շնորհալի» դպրոցի դռները. նոր ուսումնական տարվա մեկնարկ

Սույն թվականի Օգոստոսի 27-ին, Վաշինգտոնի Սբ. Աստվածածին եկեղեցուն կից դպրոցում հնչեց նոր ուսումնական տարվա բարի ավետիսը: Եկեղեցու հովանու տակ գործող «Շնորհալի» դպրոցը ևս մեկ անգամ իր հյուրընկալ դռները բացեց Վաշինգտոնի հայ համայնքի երեխաների առջև և հանդիսությամբ դիմավորեց իր սաներին: Ընդունելության արարողությունն ուղեկցվեց Գիտելիքի և դպրության օրվա տոնակատարությամբ:

Աշակերտները հնարավորություն ունեցան հանդիպել և ծանոթանալ իրենց ուսուցիչների հետ, վերհիշել արդեն ձեռք բերված գիտելիքները և սկսել հույսերով ու հույզերով լի նոր ուսումնական տարի՝ գիտելիքներով հարստանալու, նոր արժեքներ ճանաչելու և նոր ընկերներ ձեռք բերելու ակնկալիքով:

Աշակերտներն իրենց ծնողների հետ առիթ ունեցան նաև մասնակցելու սուրբ պատարագին, որի ընթացքում նրանց համար իրականացվեց հատուկ օրհնության արարողություն: Եկեղեցու քահանա Տեր Հովսեփ Կարապետյանը՝ կարևորելով կրոնի, հայոց լեզվի, մշակույթի, ավանդույթների և դրանց ուսուցման ազգանվեր գործի դերը մեր կյանքում, օրհնեց աշակերտներին և մաղթեց իմաստություն՝ նոր ուսումնական

տարին հնարավորինս արդյունավետ ու նոր ձեռքբերումներով լի դարձնելու ակնկալիքով:

Ծնողները մասնակցեցին տարվա առաջին համադպրոցական ծնողական ժողովին, որի ընթացքում ներկայացվեցին դպրոցի առաքելությունը, տեսլականը և արժեքները: Դպրոցի տնօրեն Նունիկ Նշանյանը և Տեր Հովսեփ քահանան շեշտեցին ծնողների մասնակցության կարևորությունը դպրոցի աշխատանքներին՝ ուժեղ դպրոցական համայնք կառուցելու և ավելի ապահով և մեր երեխաների համար բարելավված ուսումնական միջավայր ապահովելու համար: Նրանք ընդգծեցին, որ ծնողների ներկայությունը իրենց երեխաների դպրոցական կյանքում կամրապնդի նրանց ինքնավստահությունը, կբարելավի ինքնագնահատականը և կբարձրացնի նրանց ուսումնական մասնակցության ցանկությունը:

Դպրոցում կրթական նոր ծրագրերը կառուցվել են հիմնականում հաշվի առնելով համայնքի պահանջներն ու կարիքները: Այս տարի դպրոցը կշարունակի առաջարկել «Խոսակցական հայերեն»-ի կրթահարթակը, որի շրջանակներում աշակերտները կզարգացնեն իրենց բանավոր խոսքի հմտությունները: Պատմության դասաժամերը կդասավանդվեն որպես առանձին առարկա և, քանի որ երաժշտությունն ու արվեստը մեր հայեցի դաստիարակության անբաժանելի ու կարևոր մասնիկն են կազմում, դպրոցում նաև դասավանդվելու են երաժշտական արվեստի դասաժամեր:

Դե՛, իսկ կրոնի, հայոց լեզվի և մեր հարուստ ավանդույթների դասավանդումը, հայեցի ոգով և մտածողությամբ, Հայաստանի և հայ ժողովրդի բարգավաճման, զարգացման և առաջընթացի երազով հուսավառված հայեցի սերունդ կրթելու ցանկությունը Հայ եկեղեցու և Շնորհալի դպրոցի մշտական առաջնահերթություններն ու հիմնական մղիչ ուժն են: